

ist er abgeschaiden, und nit anders ain sach gewesen, als
ob der gaist durch die sidel vorm bet durchab were ge-
fallen. Der graf ist dieselbig nacht, wiewol glaublichen, er-
fert gewesen, das er wenig mer geschlaffen. Dieweil er
5 dann vermaint, es sei villeicht ein sele, die also zu einer
buß und genannten zeit umbgang, hat er sich desshalben
kain costen betauren lasen, als mit almusen geben, gespro-
chnen messen und vigilien, auch anderm, der hoffnung, es
solt das gespenst dardurch nachlasen. Als aber hernach
10 dergleichen unruhen kain ufherens, ist er verursacht worden
und hat nach einem schwarzkünstler im Turgew, genannt
Jacob Holzer, geworben, in mainung, den gaist beschweren
zu lasen und zu erfahren, wer er seie, auch warumb er alda
umbgang und womit im doch geholfen mecht werden. Also
15 ist derselbig Jacob etliche zeit im hof gewest, sich darin
aller gelegenhait des gaists und anders erkundiget, darbei
so vil vermerkt, das der gaist am rosstall in eim kleinen
cemmerle sonderlichen vil geferdts. Hat er sich uf ein zeit
mit geweichten liechtern, waser und andern materialien, so
20 zu beschwerung eins gaists gehören, verfast gemacht und
bei nechtlicher weil, umb die eilf uhren ungefärlichen, den
gaist mit vilen beschwerungen in das kernerle erfordert. Der
ist erschinen in einer rechten mentschlichen form und ge-
stalt, hat ein grawes haar und ein ansehenliche gestalt ge-
25 hapt, wie ein priester in ainer alben. Do hat in der Jacob
gefragt, wer er seie, warumb er do umbgang und die leut
beunrüebige, auch wie im zu helfen; item wie lang er noch
also umbgeen und büesen müese. Hierauf der gaist mit
heller und verstendlicher stim geantwurt, das solchs die
30 diener allernechst darbei im rosstall zum thail hören und
vernemmen künden: »Ich bin graf Hanns von Lupfen und
hab dise mein pein verschuldt des stifts halben alhie, seitmals
der durch mich und doctor Botzhaim höchlichen vernachtailt
und zu eim abgang ist gebracht worden. Zudem wir baide
35 in diesem hof Got höchlichen erzürnt haben unsers unlautern
und verhurten wesens halb, das wir ein lange zeit getriben,
auch vil fromer leut erliche kinder, darunter junge dechterle
gewesen, verfür. Es ist auch doctor Botzhaim gleichfals
gepeiniget, der muefs bifs zu seiner zeit an einem andern
40 ort (welches doch der gaist nit genempt) büesen. Mir kan

*

37 erliche] hs. erlicher, was wohl schreibfehler ist.